

Di dos biahe di trabou di Fondo BJP den Karibe

Ronda di subsidio ta produsí publikashon ku impakto real

E di dos biahe di trabou di Fondo BJP pa e seis islanan karibense den Reino a mostra ki impakto un sosten dirigí na periodismo lokal por tin. Riba kada isla, periodistanan a konta kon nan a usa e subsidio otorgá den e promé ronda pa krea periodismo karibense ku no solamente a stimulá diskushonnan sosial, sino tambe konta ku resultadonan konkreto.

Na Boneiru, Nathaly Evertsz a papia di e promé parti di su dokumental tokante ‘cold cases’ na e isla, loke a duna un perspektiva nobo na e manera kon ta atendé kasonan polisial ku no a keda resolvé ainda. Na Kòrsou, Tittel Del Mar a konta di su longread tokante kultura di koredónan di motosaikel, loke a bira un fuente di informashon pa un diskushon sosial mas ekstenso. Na Sint-Maarten, e investigashon di Rajesh Chintaman tokante maneho di kapmentu di palu a resultá den supervishon mas estrikto i promesa di klupnan pa planta mas palu rondó di nan terenonan deportivo. I na Aruba, skolnan awor ta inisiá un kòmbersashon ku nan alumnonan, usando e dokumental di Ephrayim Odor tokante hóbennan ku ta bai Hulanda pa studia. [Aki](#) por mira tur publikashon ku a keda realisá ku subsidio di Fondo BJP pa proyektonan karibense.

Nesesidat pa periodismo independiente

Segun Fondo BJP, e ehèmpelnan akí ta konfirmá kon grandi e nesidat ta pa un periodismo independiente basá riba realidatnan lokal. Durante kòmbersashonnan ku periodista-, kreadó- di notisia, redaktor-, i doñonan di medionan di komunikashon na e islanan, e siguiente pregunta tabata sentral: kon por fortalecé i alsa periodismo karibense di forma struktural? Durante e biahe a resultá ku e nesidat pa interkambio i sosten ta grandi, miéntras ku e posibilidatnan pa kumpli ku nan ainda ta limitá.

“Nos a konstatá ku e bos karibense ku ta resoná den periodismo hopi biaha ta pertenesé na un periodista ku ta biaha bai e islanan, saliendo for di un ofisina di redakshon, kaminda e tin sosten di un redakshon, seguridat finansiero i un ret di sosten na Hulanda. Pero e falta tambe un ret lokal, konosementu relevante di e konteksto karibense i e ta karesé dominio di e idiomaan papiá,” asina Wensly Francisco, eksperto di Fondo BJP pa areglonan di subsidio karibense, ta bisa. “Miéntras ku e periodistanan di e islanan mes tin nan propio bos, tópiko, ekspertisio, método- i retnan sosial. Loke nan mester ta rekursonan finansiero, seguridat di trabou pa por traha ku konfiansa i plataformanan independiente ku ta duna nan chèns pa nan bos resoná.”

Joëlle Terburg, direktor gerente di Fondo BJP, tambe a papia huntu ku Francisco, ku representantenan di gobièrnu i otro dirigentenan di e islanan. Semper pa haña kontesta di un solo pregunta: ki tipo di periodismo e isla tin mester? “Den nos trabou, refuerso di e funshon di periodismo pa mantené demokrasia den henter Reino ta sentral. Un periodismo sólido i independiente ta esensial pa kontrolá poder, hasi desaroyonan sosial visibel i informá siudadano. Pa por kumpli ku esaki di forma adekuá, periodistanan mester por traha di manera independiente, sinti nan seif i haña sufisiente medionan pa por ehersé nan trabou,” Terburg a deklará.

Tambe a deliberá ta kiko mas por hasi pa stimulá formashon di retnan konhunto, desaroyo profeshonal i kolaborashon mutuo. “Periodistanan tin hopi nesidat di esaki, pero oportunitatnan

ainda ta limitá. Esakinan ta tambe puntonan ku Fondo BJP lo sigui traha riba dje den kolaborashon ku periodistanan lokal, kreadó di notisia i otro partidonan relevante, banda di e sosten aktual i kontinu pa proyekto- i publikashonnan. Nos ta enfoká riba konsistensia i konstrukshon di relashon- i oportunidatnan di supsidio duradero.”

Pa kuminsá, Fondo BJP lo organisá un seshon pa periodistanan profundisá nan mes kon atendé kuambio di klima, saliendo for di un perspektiva karibense — pasobra kambionan klimátiko ya ta afektando islanan di Karibe di forma real — komo parti di e Festival di Periodismo Hulandes na Deventer na sèptèmber 2027. Mas informashon di esaki lo sigui despues.

Ronda di supsidio ya a habri

For di 11 di mei te 15 di yüni, periodista- i kreadónan di notisia ku ta biba den e parti karibense di Reino por entregá un petishon pa supsidio di un proyekto. Por haña mas informashon [aki](#).

Bo ke keda na altura?

Bo ke keda al tanto di aktividatnan di Fondo BJP pa sostené periodismo karibense? Sigui nos den medionan sosial òf suskribí pa risibí nos boletin – tantu esun [general](#), komo e [boletin spesífikamente dirigí riba periodismo karibense](#).